

## Banaketaren modari jarriak

### I

Gaztetan hainbat maitemin  
dena fresko, dena gordin  
odola bero, buruak amets  
ta zerua urdin...  
Ta gero denborarekin  
txoro-haizeak aldegin  
haragi sena ta maitasuna  
ez baitira berdin.



XDY

### IV

Lehen gozo zirenak gazi  
eta ezin galarazi  
baina lehenengo garratzaldian  
etsitzen ez hasi.  
Bihotzari eginarazi  
bi aldetara gimnasi:  
Gozatzen segi nahi baldin bada  
sufritzen ikasi.

### II

Lehen ezkontza zen reliki  
baina aldatu da ederki,  
banantzeari ate guztiak  
zaizkio ireki.  
Nahiz maiteena atxiki  
bihotz handiena txiki  
lehen gehiegi sufritzen zuten  
ta orain gutxigi.

### V

Emakume edo gizaki  
–haragizkoak izaki–  
onenari ere bila daiteke  
nahi aina aitzaki.  
Akatsak soilik ez aurki  
horrek onik ez dakarki  
hutsak barkatzen ez dakienak  
maitatzen ez daki.

### III

Bikoteen harremanak  
eta ezin eramanak  
alderantzizko joera dute  
ama baten planak:  
benetan maite duenak  
barkatu ohi ditu danak  
seme pordila gehiena maite  
ohi du beti amak.

### VI

Gizakiaren hazia  
nola den gure bizia  
bera lantzeko bikotea da  
baratz berezia.  
Beraz, egin gimnasia  
egin daiteken guzia  
gero ere gozo gertatu dadin  
hain gozo hasia.

**DOINUA:** Haizak hi mutil mainontzi.